

# DIE TRADISIONELE BOEREMUSIEKKLUB VAN SUID-AFRIKA

## NUUSBRIEF

UITGAWE 2 2022



**Dalene en Flip Snyman**

**Datums van byeenkomste, jaarvergaderings (in donker gedruk), asook kontakpersone en hul telefoonnommers vir 2022 & 2023**

<b>Wesrand</b>	<b>Pretoria</b>	<b>Oosrand</b>	<b>Vaal-Driehoek</b>	<b>Goudveld</b>
10 Sep. '22	<b>8 Okt. '22</b>		3 Sep. '22	
3 Des. '22	26 Nov. '22			
11 Feb. '23	21 Jan. '23		<b>4 Feb. '23</b>	<b>28 Jan. '23</b>
<b>15 Apr. '23</b>	<b>25 Mrt. '23</b>		1 Apr. '23	29 Apr. '23
2 Sep. '23	16 Sep. '23		26 Aug. '23	9 Sep. '23
2 Des. '23	25 Nov. '23		4 Nov. '23	25 Nov. '23
Flip Snyman	Diek Brits	Martin Dorfling	Willie Badenhorst	André Burger
011 955 3615	082 415 4620	082 542 1908	016 932 1897	057 398 1022
082 624 5308			076 389 7079	084 598 1022

Om te verseker dat ons gewaardeerde ondersteuners geen voordele van die TBK misloop nie, word u versoek om ledegeld op datum te hou deur van die aftrekorderstelsels gebruik te maak. U bydrae gaan nie ongesiens verby nie en ons verstaan dat lede dalk hard getref is gedurende hierdie moeilike tye. Skakel gerus met ons om te praat oor u unieke situasie. Die lidmaatskapfooi beloop R80,00 per jaar en kan deur middel van die internet, direkte deposito of tydens 'n byeenkoms betaal word. Bewyse van betalings wat deur die internet of direkte deposito geskied, moet aan [lidmaatskap@boeremusiek.org](mailto:lidmaatskap@boeremusiek.org), of **Posbus 2555, Wilropark, Roodepoort, 1731** gestuur word.

**Gebruik asseblief u lidnommer, voorletter en van as verwysing.**

## Neem asseblief kennis van die debietorderpryse:

R25,00 per maand – lidmaatskap, korrespondensie en 1 laserskyf per jaar.

R34,00 per maand – lidmaatskap, korrespondensie en 2 laserskywe per jaar.

R42,00 per maand – lidmaatskap, korrespondensie en 3 laserskywe per jaar.

R50,00 per maand – lidmaatskap, korrespondensie en 4 laserskywe per jaar.

Indien daar enige lede is wat navrae aangaande lidmaatskap en debietorders het, kontak gerus Aletta Dorfling by 010 541 0978 of [lidmaatskap@boeremusiek.org](mailto:lidmaatskap@boeremusiek.org).

## **Bankbesonderhede: TBK, ABSA, Tjekrekening, Rekeningnommer 090281062**

Laserskywe en TBK-verwante items: Aletta Dorfling, [verkope@boeremusiek.org](mailto:verkope@boeremusiek.org) 010 541-0978, Kiepersolstraat 30, Wilropark, Roodepoort, 1731 of Posbus 2555, Wilropark, Roodepoort, 1731.

TBK Webblad: <http://www.boeremusiek.org>

TBK e-posadres: [info@boeremusiek.org](mailto:info@boeremusiek.org)



[Tradisionele Boeremusiekklub](#)



[TBK se amptelike WhatsApp groep](#), of volg die skakel op Facebook

Lede moet asseblief bydraes lewer vir die nuusbrieff. Stuur bydraes aan: [nuus@boeremusiek.org](mailto:nuus@boeremusiek.org) in “**Word**”-formaat asseblief.

**Dankie aan almal wat bydraes vir hierdie nuusbrieff gelewer het.**



Luister na die Tradisionele Boeremusiekprogram op Pretoria FM, Boeremusiek: Toeka tot Nou, aangebied deur Hugo Radley en Martin Dorfling. Hulle gesels onder meer oor orkesleiers, musikante en musiekinstrumente. Vir gedagtes, kommentaar of somer net gesels, kan hulle gekontak word by [hradley@global.co.za](mailto:hradley@global.co.za). U kan na Pretoria FM luister op 104.2 fm, DSTV musiekkanal 887 of op die internet [www.pretoriafm.co.za](http://www.pretoriafm.co.za). Die program word Vrydagaande om 19:15 uitgesaai.

# IN MEMORIAM



Gerda du Plessis  
29 April 2022



Ds. Kobus Muller  
20 Junie 2022



Phillip Raath  
23 Junie 2022



Lina Kapp  
1955 - 2022



Nicho en Mariaan Ungerer  
29 Mei 2022

## SKRYWES ONTVANG VAN LEDE

### Boeresports

In die ou dae was 'n boeredans nie 'n boeredans sonder dat die jong kêrels mekaar 'n paar poetse gebak het nie en dan was dit ongelukkig die stomme dames wat meeste aan die kortste end getrek het.

Toe misvloere nog algemeen was, moes die dansvloer gereeld met water besprinkel word om te sorg dat daar nie te veel stof opgeskop word en die mense die volgende oggend met swart randjies om hul neusgate wakker word nie. Sulke tye word dan "balke toe!" geroep en die jong kêrels spring dan op en hang dan aan die balke, terwyl die dames en die ouer ooms van die dansvloer afbeweeg terwyl die takie verrig word.

Later, toe sementvloere die misvloere vervang het, is bevind dat die sementoppervlak bietjie te grof was om lekker te kan dans en het hulle dan meel, in plaas van water, op die dansvloer gestrooi. Die kwaaijongens het dan 'n bos perdestert hare in klein stukgies geknip en dit saam met die meel oor die vloer gestrooi. Soos enige vioolspeler jou sal vertel, het 'n perdestert haar mikroskopiese weerhakies wat veroorsaak dat die viool snaar vibreer. Met die dansery waai die perdestert op en klou aan die dames se bene vas. Die weerhakies veroorsaak dat die stukgies hare in een rigting kruip, sommiges ongelukkig boontoe, en veroorsaak 'n onheilige gejeuk!

In die somermaande, veral met Nuwejaar, kan so 'n opskop maar 'n sweterige affêre afgee. Daar was nie lugversorgers of elektriese waaiers om die dansers vars en koel te hou nie. 'n Vertrek was dan ingerig waarheen die dames kort-kort heen kon verdwyn om hulself te verfris. In die kamer was daar die gewone wastafel met handdoeke, seep,

ensovoorts. Die belangrikste was die bakkie lyfpoeier met ‘n kwas vir aanwending. Onthou, dit was voor die dae van “roll-ons” en dies meer. Dan het die vabonde stilletjies die bakkie lyfpoeier met ‘n bakkie meelblom omgeruil. Wanneer die arme meisie, lekker warm gedans, haar arm optel, trek die deeg dan sulke drade ...

Stephaan van Zyl

## **SKRYWES ONTVANG VANAF TAKKE**

### **PRETORIA-TAK**

Geagte TBK-lede en -ondersteuners

Wat ‘n interessante jaar was dit nie! Dinge het so vinnig gebeur dat mens net nie kon bybly nie. Dit was ‘n jaar van smart en blydskap. Ons het getreur maar was ook opgewonde oor die toekoms van boeremusiek. Daar is soveel van ons mense wat nie meer met ons is nie, maar hulle bly nog in ons harte. Ons dink aan almal wat geliefdes aan die dood moes afstaan.

Die lewe gaan voort, en so het ons, ons eerste byeenkoms op 19 Maart 2022 in die nuwe saal gehad. Hiermee wil ek graag net byvoeg dat oom Hennie en sy helpers ‘n goeie taak verrig het. Dankie aan oom Hennie wat vir soveel jare as Voorsitter gedien het. Oom Hennie het ook besluit om die tuig neer te lê as gevolg van gesondheidsredes. ‘n Nuwe bestuur is ook gekies. Flip Snyman – die Nasionale Voorsitter – het dit behartig. Die nuwe bestuur van die Pretoria-tak sien soos volg daarna uit:

Voorsitter: Diek Brits

Ondervoorsitter: Pieter Botha

Sekretaresse: Adamari Bredenhann

Penningmeester: Stephaan van Zyl

Addisionele lede: Jurie Wessels (klankingenieur), Jan van Wyk, Niekie Bredenhann, Martin Dorfling, Hugo Radley, Miranda Radley, Marthie Brits.

Ons eerste byeenkoms was ‘n groot sukses. Daar was so 150 mense, orkeste ingesluit. Die orkeste wat ons vermaak het met hulle pragtige musiek was Stephaan van Zyl en Danie Grey, Magalies boeoreorkes, Dagbreek boeoreorkes asook Mario du Plessis. Die aand het wonderlik verloop. Met die laaste speelbeurt het Stephaan en Danie bekende nommers gespeel waar die mense spontaan begin sing het. Wat ‘n belewenis was dit nie! Mense het gehelp waar hulle kon met op- en afslaan van tafels en stoele. Vir my as nuwe voorsitter weet ek hier kom ‘n ding vir die toekoms.



**V.l.n.r.: Jurie Wessels, Stephaan van Zyl, Jan van Wyk, Martin Dorfling, Pieter Botha, Diek Brits, Marthie Brits, Adamari Bredenhann en Niekie Bredenhann.**

Op 23 April 2022 hou die bestuur van die TBK-tak van Pretoria vergadering by ons aan huis. Daar is sekere besluite geneem en take uiteengesit vir die volgende byeenkoms. Van my kant af dink ek ons het 'n baie sterk bestuur wat die Klub na 'n nuwe hoogte gaan vat.

Op 21 Mei 2022 het die tak weer 'n dans gereël wat ek toe nie kon bywoon nie as gevolg van 'n rugbesering. Pieter het ingewillig om die Voorsittertaak oor te neem. Die terugvoering wat ek gekry het, is dat hy dit uitstekend gedoen het. Dankie Pieter en die bestuur wat wonderlik saamgewerk het. Die vooraf-orkeste wat vanaf 16:00 die middag die mense vermaak het, was Corrie Jacobs en sy manne en Willie Badenhorst en sy seuns. Orkeste wat opgetree het vanaf 18:00 was Stephaan en sy manne, Dagbreek en ook Magalies orkeste. Weer het die mense spontaan begin saamsing. Iets wat ons meer moet doen in die toekoms.

Ek het sommer van die begin af dit goedgevind om 'n nuwe klanksisteem aan te koop. Die ou een was groot en lomp met verouderde tegnologie. Daar was 'n paar haakplekke met die nuwe sisteem tydens die byeenkoms. Soos met alle nuwe dinge sal dit vinnig uitgesorteer kan word met ons bekwame klankmanne.

Ons volgende byeenkoms is 8 Oktober en 26 November 2022. Ons hoop om julle almal weer daar te sien. Selfde plek, selfde tyd. Bring asseblief julle vriende en familie saam. Ons is mos immers een groot familie!

Vriendelike groete, Diek Brits

## WESRAND-TAK

Aan die Wesrand gaan dit nog baie goed met die boeremusiek. Daar word oral by geleenthede deur orkeste musiek gemaak en ons sien baie op die sosiale media video's van orkeste wat hulle musiek plaas. Die Covid-pandemie het ons wel verhinder om byeenkomste te hou, maar het beslis nie boeremusiek doodgemaak nie.

Dit is ook met hartseer dat ons van ons lede en vriende onlangs aan die dood moes afstaan. Ons dink aan die eggenote van Chris Kapp, Lina Kapp. Chris was die bestuurslid van die Pretoria-tak wat vir meer as twintig jaar die braaivleisvure hanteer het. Ek en Dalene is vriende met hulle vir meer as vyftig jaar. Gerda du Plessis wat in die beginjare die lidmaatskap, plaat- en kassetverkope van die TBK hanteer het. Nicho en Mariaan Ungerer; die twee pragtige persone is Sondag 29 Mei albei in 'n noodlottige motorongeluk oorlede. Dit is 'n groot terugslag, nie net vir Die Kleilatte orkes nie, maar ook vir ons boeremusiekvriende. Op 21 Junie ontvang ons die nuus dat ds. Kobus Muller, ons vorige Nasionale Voorsitter, oorlede is. Watter hartseer nuus om oor te dra. Ons sal hom altyd onthou vir sy positiewe bydrae en opnames van baie musiek. En so moes ons ook vir Phillip Raath op 23 Junie aan die dood afstaan.

Die Witpoortjie Ontspanningsentrum waar daar in die verlede TBK-byeenkomste gehou is, word nogsteeds gebruik vir Covid-inentings. Daar is na baie sale en plekke gesoek wat geskik moet wees vir ons TBK-behoefes. Na die opskorting van die inperking, is daar besluit om **Laerskool Dr. Havenga se skoolsaal** in Generaal Pienaarlaan in Witpoortjie, te gebruik. Dit is baie naby aan die ou saal waar ons funksies gehou het. Ons volgende funksies sal op 10 September 2022 en 3 Desember 2022 daar plaasvind. Daar is baie veilige en onderdakparkering met 'n karwag. Die volgende byeenkomste se datums sal aangekondig word.

Boeremusiekgroete, Flip Snyman

### Fluit-fluit

Alle goeie dinge kom tot 'n einde. Weens veranderende werksomstandighede, is hierdie ook my laaste nuusbrieff na 11 jaar.

Baie dankie aan elkeen se bydrae, briefie, kommentaar en dankie. Dit was altyd lekker om heel eerste die bydraes te lees! Spesiale dank aan oom Willie Badenhorst wat altyd vroegtydig Vaaldriehoek-nuus gestuur het, ds. Serfontein wat gereeld bydraes gelewer het en oom Stephaan wat altyd bereid was om 'n ietsie ekstra te skryf om 'n gaatjie op die nuusbrieff te vul.

Ek het by die TBK grootgeword en die boeremusiek het 'n spesiale plekkie in my hart! My pa het gedurende 1981 tydens 'n Konsertinaklub-opname by die destydse SAUK, by die Klub aangesluit. Baie mense het 'n spesiale plekkie in my hart, onder andere oom Sias en oom Flip en tannie Dalene Snyman. Ek en oom Flip het al saam gaan diepseevisvang en gemmerkoekies geëet, wat nie gehelp het nie ... Ons speel ook graag saam met oom Flip-hulle *konstina!* Aan tannie Dalene: "agter elke suksesvolle man ..."

Ek onthou: in die kleuterskool het ek trompoppies gedoen en die Wesrand-tak het pannekoek by oom Ben en tannie Elsie Low se karavaan by Cecil Payne stadion in Roodepoort tydens 'n lentedagviering verkoop; tannie Gerda en oom Doep wat die plate verkoop het tydens byeenkomste; oom Paul en tannie Tina (wat die TBK se groen tafeldoeke geskenk het) se TBK-horlosiebord wat altyd op hul tafel was; oom Rooies en oom Peet van Staden wat met 'n handdoek om die nek gedans het; tannie Hettie Landman wat die lekkerste

klapper- en speseryekoekies gebak het, asook tannie Pop se fluweelsagte fudge wat ek tydens Wesrand-byeenkomste by my snoepie verkoop het; hoe ekstra mooi die saal opgemaak was toe Lieb Bester kom speel het en oom Danie Labuschagne wat elke keer vir my sê ek het darem groot geword ...



**Op lentedag in 1993 by Cecil Payne stadion sit Natasja op haar oupa se skoot. Ook op die foto is Gert Jooste, Flip Snyman en oom Ben Low.**

Met n lied in my hart en baie trane in my oë groet ek julle. Mooi bly, en onthou, jy is genoeg!

Baie liefde, Natasja xxx

### Totsiens maar nie vaarwel

So aan die helfte van 1990 nooi een van my oud-werkskollegas, Lood de Lange my om 'n byeenkoms van die Tradisionele Boeremusiekkklub in Pretoria by Kentron by te woon, nadat hy agtergekom het ek luister na Span die Bokseil op SAUK se Afrikaanse

*"Sout is goed, maar as sout sy krag verloor het, waarmee sal 'n mens dit weer sout maak? Julle moet werklik sout wees en in vrede met mekaar lewe."*

- Markus 9:50 -

radiostasie. Dit wat ek daar gesien en gehoor het, was waarna ek al baie jare gesoek en waarmee ek grootgeword het. Daarna was dit verby en ek het dadelik by die TBK aangesluit. Dit was vir my 'n baie groot eer en voorreg om die hoofbestuurslede van die TBK en al die groot musikante te ontmoet en hulle in lewende lywe te sien tradisionele boeremusiek maak. Daarna was ek gereeld by die byeenkomste en as beginnermusikant die geleentheid gehad om saam met van die musikante op uitnodiging te kon musiek maak.

'n Paar maande later kry ek een aand 'n oproep van Stephaan van Zyl, leier van "Die Oudag Boereorkes" waar hy my toe uitnoui as musikant om saam met sy orkes na Bethlehem te gaan vir die aftrede-funksie van Tinus Terblance. Dit was vir my 'n baie groot eer en voorreg en ek het ingestem, waarna ek deel van die "Oudag Boereorkes" geword het. In daardie tyd was daar na baie byeenkomste landwyd gereis om musiek te maak of sommer net te gaan kuier. In 1995 tydens die radio se Boereorkeskompetisie behaal "Die Oudag Boereorkes" tweede plek naas die wenner Marius Louw en sy orkes. Die Oudag Boereorkes was baie gewild en het byna by elke TBK-byeenkoms opgetree, asook op versoek by ander geleenthede. Ongelukkig weens werksomstandighede en verhuising van orkeslede het die orkes sy laaste optrede aan die einde van 1998 in die Akasia Stadsaal in Pretoria gehou tydens 'n oujaarsdans. Dit was 'n hartseer aand, maar daar was daarna nog by baie byeenkomste saamgespeel en dit gebeur vandag nog.

Die TBK-Wesrand is gestig op 17 April 1993 waartydens ek en Dalene, my vrou, deel van die bestuur geword het. Die destydse voorsitter, wyle oom Ben Low, sterf in Mei 2003 en as ondervoorsitter moes ek die tak se pligte as voorsitter oorneem. Vandag, na 19 jaar, doen ek dit steeds en dit is vir my 'n groot voorreg en eer. Dit sou nie gebeur het sonder die wonderlike ondersteuning van my vrou, die Wesrand-bestuur, lede en ondersteuners van die TBK nie.

Tydens die TBK se Algemene Jaarvergadering op 4 Oktober 2008 was dit vir my die grootste eer en voorreg om as Nasionale Voorsitter verkies te word. Dit was 'n baie groot uitdaging om die vorige voorsitters se skoene vol te staan, maar met die wonderlike ondersteuning van my vrou Dalene, bestuurslede en elkeen wat lief is vir die musiek, was dit moontlik om die TBK vorentoe te lei. Sedert 2008 het daar meer as 52 laserskywe die lig gesien waarvan 22 nuwe-orkes opnames was. Dankie aan die TBK en musikante se samewerking wat hierdie laserskywe die lig laat sien het.

Die tegnologiese vooruitgang en die ouderdom het baie vinniger nader gesluip as wat ek besef het. Daarom word ek genoodsaak om as Nasionale Voorsitter na 14 jaar my nie weer verkiesbaar te stel nie en die leisels na jonger, bekwaame persone oor te gee wat ek glo die TBK nie in die steek sal laat nie.

Duisende dankies aan alle bestuurslede, gewese bestuurslede, musikante en boeremusiekvriende se liefde en ondersteuning. Mag die doelstelling van die TBK nie vergeet word nie en ons tradisionele boeremusiek bewaar en bevorder word.

‘n Spesiale dank aan Natasja de Jager, dogter van erelede Piet en Eldrene de Jager, wat as kleuter voor my en saam met die TBK-Wesrand grootgeword het en as persoon baie na aan my hart lê. Sy het die afgelope 11 jaar die nuusbrieff as redaktrise behartig.



**Natasja de Jager en Flip Snyman**

Boeremusiekgroete, Flip en Dalene

### Notule van die Algemene Jaarvergadering van die TBK soos gehou op 5 Oktober 2019 te Pretoria

1. Opening en verwelkoming: J. Vlok open met Skriflesing en gebed om 17:00.
2. Presensie: Die aanwesiges vorm ‘n kworum.
3. Vorige Notule: Word voorgelees deur S. van Zyl. Mosie vir aanvaarding: D. Grey, sekondant: W. Badenhorst.
4. Finansies: J. Vlok lewer die finansiële verslag en nooi lede om na die vergadering die boeke te inspekteer. Toestemming word van lede verkry om Odette Jacobs van De Jager Ouditeure te betaal en om hulle weer aan te stel.
5. Takverslae: Vaaldriehoek-takverslag gelewer deur W. Badenhorst, Oosrand deur M. Dorfling, Pretoria deur N. Blom en Wesrand deur D. Snyman.
6. Oorkondes en Toekennings: 15 Jaar-sertifikate sal aan die betrokke lede gepos word. P. Snyman-wisseltrofee word ontvang deur N. Blom. H. Schoeman-wisseltrofee word deur H. Schoeman self aan Hugo en Miranda Radley oorhandig. Nuwe erelede: Johan en Lettie Smalberger, Pat en Tina Meyer en ‘n spesiale toekenning aan Willie Putter.
7. Voorsittersverslag: Word gelewer deur F. Snyman.
8. Verkiesing van nuwe voorsitter: F. Snyman word eenparig as voorsitter herkies.
9. Verkiesing van Komitee: Ondervoorsitter: M. Dorfling, Penningmeester: J. Vlok, Sekretaris: S. van Zyl. Addisionele lede: A. Dorfling, S. Minnie en H. Radley. Gekoöpteerde lede: A. Blom en A. Burger.
10. Algemeen: Staan oor.
11. Afsluiting: Vergadering verdaag om 18:00.

## KATALOGUS – 2022

Kontak Aletta Dorfling 010 541-0978 of [verkope@boeremusiek.org](mailto:verkope@boeremusiek.org) in verband met aankope van laserskywe, boeke en artikels. Laserskywe word per koerier (Aramex) gestuur teen R100.

Willie Badenhorst se Orkes – Tradisionele Boeremusiek uit die Wakis	R100
Lourens van Zyl & sy Orkes – Note vir Attie	R100
Die Lekker Kêrels – Musiek uit die Hart	R30
TBK 35 Jaar (Dubbel laserskyf)	R50
Hans la Grange (Vol. 6)	R100
Oom Jan van Rooyen en Willie Baucher	R100
Carolina Leeson & Hannes Buitendag – Traporrel en Mondfluit	R100
Piet Botes en sy Konsertina	R100
Hugo, Lourens en Quintin – Outydse Boeremusiek	R100
Theo Slabbert – Ou Bok Jong Blaar	R100
Gerrie Bezuidenhout (Vol. 2)	R100
Oom Faan Harris en sy Konsertina	R100
Tant Bettie Ferns	R100
Chris Bignaut – Immergoud	R480
Dawid de Lange – Immergoud Sonop	R100
Dawid de Lange – Immergoud	R400
Danie Grey – Die Musikant	R100

### **Nuwe Vrystellings:**

Japie Laubscher en sy Ysterplaat kêrels (Vol. 4)	R100
Nico van Wyk	R100
Al met die Stofpad Langs – Kaapland Boereorkes	R100
TBK 40 Jaar (Dubbel laserskyf)	R140
Stephaan Speel Boerekonsertina	R100
Japie Laubscher en sy Ysterplaat kêrels (Vol. 3)	R100
Willie Welgens en sy Suikerbossie	R100
Boeretros Boereorkes	R120
Japie Laubscher en sy Ysterplaat Kêrels (Vol. 2)	R100
Kampvuur Klanke uit die Vaaldriehoek	R120
Oom Gideon van Rooyen	R100
Japie Laubscher en sy Ysterplaat Kêrels (Vol. 1)	R100
Die Sandvelders: Namakwaland toe	R100

Tony Waterloo/Herman Wolfswinkel	R100
Die Wakis Orkes: O'ver die Water	R100
Frik Smit en sy Orkes – Wals vir Lena	R100
Outydse Potjiekos (Vol. 3)	R30
Dawid de Lange (Vol. 3)	R30
Oom Boet Steyn se Laaste	R30
<b>Kies enige drie van die volgende laserskywe en betaal slegs R200:</b>	
Piet Snyman – Piet Snyman en Vriende	R100
Jan Mans – Oud maar nie Koud	R100
Magalies Orkes – speel Boeremusiek	R100
Wals vir Antoinette – Piet Snyman	R100
<b>Boeke:</b>	
Die Ontstaan en Ontwikkeling van Boeremusiek – Wal Schultz	R50

## SMOUS-HOEKIE

Enige persone wat musiekinstrumente en/of verwante produkte soek of aanbied, kan 'n versoek stuur aan [info@boeremusiek.org](mailto:info@boeremusiek.org).

Flip Snyman doen herstelwerk aan banjo's en kitare.  
Kontaknommer (011) 955-3615.

Stephaan van Zyl stem konsertinas en beskik oor 'n handleiding oor hoe om 'n konsertina te bespeel.  
Kontaknommer (012) 991-1732 of 082 777 0124.

### *Voorsitter se Kersboodskap*

*Dit staan alweer na die einde van die jaar toe en daar is 'n nuwe jaar wat wink. Die jaar het so vinnig verby gevlieg en daar het so baie dinge gebeur die afgelope jaar. Ons het baie van ons geliefdes, vriende en boeremusiek-musikante aan die dood afgestaan. Dit het baie hartseer en groot leemtes vir ons agtergelaat. Ons sal die persone baie mis en sal hulle nog lank onthou. Die lewe gaan voort en ons moet maar aangaan. Hiermee wens ek elke boeremusiekliefhebber, musikant en vriend 'n baie Geseënde Kersfees en 'n baie voorspoedige 2023 toe. God se rykste seën.*